

Inuussutissanik immuup sukkuunik akoqanngitsunik pisariaqartitsisunut qanoq akikinnerulersitsisinnaanersugut pillugu misissuinissamik aallartitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuinermi naatsorsorneqassaaq innersuussutit ataasiakkaat aningaasatigut inuiaqatigiinnut kinguneqassanersut.

(Inatsisartunut ilaasortaq Justus Hansen, Demokraatit)

Akissuteqaat

(Inuussutissarsiornermut, Nukissiuuteqarnermut Iisimatusarnermullu Naalakkersuisoq)

Aappassaanneerera

Aalajangiiffigisassatut siunnersuutip suliarineranut atatillugu Inuussutissarsiornermut Aatsitassanullu Ataatsimiititaliap sukumiisumik suliaqarsimanera Naalakkersuisut sinnerlugit qutsavigerusuppara.

Kalaallit Nunaanni atuisartunut nerisassat immuup sukkuunik akoqanngitsut qanoq ilillutik akikinnerulersinneqarsinnaanerisa misissorneqarnissaat pillugu amerlanerussutillit tapersersuinerat Naalakkersuisut nuannaarutigalugu malugaat.

Nerisassat tuluit oqaasiinik nalunaaqutsersukkat nioqqutiginiisaannut akuersissuteqarneq pillugu nalunaarutip killiffia Inuussutissarsiornermut Aatsitassanullu Ataatsimiititaliap isumaliutissiissumminni apequtigisimavaat.

Tuluit oqaasii atorlugit nalunaaqutsersuisarneq akuerisangortillugu nerisassianik nalunaaqutsersuisarneq pillugu nalunaarutip allangortinneqarnera nalunaarutigineqareertoq Naalakkersuisut ilisimatitsissutigisinnaavaat.

Piffissami matumani pisiarisartakkat akii appartinneqarsinnaanersut qanorlu ilillugit periarfissanut siunnersuuteqarnissamik siunertaqartumik Kalaallit Nunaanni pisiarisartakkat akiinik Naalakkersuisut misissuineq maannakkut ingerlataat.

2019-imi ukiap ingerlanerani paasissutissanik katersuineq annertoq Naalakkersuisut naammassivaat, taakkulu pisiarisartakkat akii appartinneqarsinnaanersut qanorlu ilillugit misissugarinissaannik siunertaqartumik misissoqqissaarneqassapput. Misissueqqissaarineruttaaq nerisassat immuup sukkuataqanngitsut atuisartunut nioqqutinik tamakkuninnga pisariaqartitsisunut qanoq akikinnerulersinnaaneranut periarfissat misissussavai.

Taamatut oqaaseqarlutik siunnersuut akuerisassangorlugu Naalakkersuisut innersuutigaat.